

淮安文献丛刻

淮安市地方志办公室编

乾隆淮安府志

(清)卫哲治等 修

叶长扬等 纂

荀德麟等 点校



方志出版社

封面绘图：定 生
篆 刻：冯 勇
版式设计：槿 轩
责任编辑：卫家雄



ISBN 978-7-80238-305-0



9 787802 383050

(全二册) 定价：200.00 元

目 录 (下)

第十九卷	名宦	753
	忠烈	753
	镇抚大僚	758
	守令佐贰	786
	师儒	820
第二十卷	选举	834
	进士	836
	举人	851
	武进士	881
	武举	885
	恩贡 岁贡	901
	拔贡 优贡 副榜贡	971
	征辟 保举 贡监 乡饮	981
	勋爵	1001
	勋封 胄荫附	1005
第二十一卷	封建	1014
第二十二卷	人物	1025
	孝行	1026

	忠烈	1044
	仕迹	1055
	将略	1105
	儒林	1111
	德义	1115
	文苑	1129
	隐逸	1145
	流寓	1149
	方外	1155
	方技	1161
第二十三卷	列女 贤母 孝妇 烈妇 节妇 贞女 ...	1164
第二十四卷	物产	1253
第二十五卷	五行	1262
第二十六卷	坛庙	1278
第二十七卷	驿传	1304
第二十八卷	古迹	1315
	冢墓附	1327
第二十九卷	艺文 奏疏 传记	1332
第三十卷	艺文 诗赋	1449
	历朝诗上	1450
	历朝诗下	1494
第三十一卷	辨讹	1574
第三十二卷	杂纪	1587
	重刊《淮安府志》跋	1598

卷十九 名 宦

忠烈

叙

昔人谓：“愿为良臣，不愿为忠臣。”夫人臣而以忠节见，岂得已哉？淮郡扼南北之吭，为江淮间必争之地，不幸而国家多事，守是土者，义不得不与为存亡，至于计无复之，外援俱绝，犹将徒手奋呼、挥戈指日，以明在三之节，有死不二，亦云壮哉。历观南唐张彦卿、元季褚不华诸君子，当危亡之际，誓守孤城，而其时偏裨卒吏，亦皆能慷慨报效，卒致阖郡守死以殉，忠义所感，有由然也。独怪淮郡既数被兵革，捐躯蹈义者当指不胜屈，而自刘宋迄元明，仅得贺弼而下十有一人，其间湮没而失传者，又可胜道哉？志《忠烈》第十九。

宋

贺弼，字仲辅，会稽山阴人。有文才，历官山阳太守。竟陵王诞谋逆，弼固谏不从，服药自杀。诞败，赠弼车骑将军。时有梁旷者，素以勇直著，为山阳内史。家在广陵，刘诞执其妻子，遣使邀旷，旷斩使拒之。诞败，擢为游击将军。《南史》。

南唐

张彦卿、郑昭业，皆不知何郡县人。保大末，彦卿为楚州防御使，昭业为兵马都监，共守楚州。中兴元年，周世宗南侵。元宗下令，命焚东郡宫寺与民庐，徙其民渡江。世宗亲攻楚州，城守甚坚，攻四十日不能破，乃以梯冲临城，凿城为穴，实薪焚之，遂陷。彦卿犹取绳床搏战，与郑昭业等千余人皆死之，周兵死伤亦甚众。世宗怒，屠城，焚庐舍殆尽。元宗嘉彦卿忠，诏赠侍中。《十国春秋·张彦卿传》。

宋

赵立，徐州张益村人，以敢勇隶兵籍。靖康初，金人大入，立数有战功，累迁右卫大夫、忠州刺史。会金围楚州急，通守贾敦诗欲以城降，宣抚使杜充命立将所部兵赴之，且战且行，连七战皆胜，而后能达楚州。两颊中流矢，不能言，以手指麾。既入城，休士而后拔镞。诏以立守楚州。明年正月，金人攻城，立命撤废屋，城下燃火池，壮士持长矛以待。金人登城，钩取投火中。金人选死士突入，又搏杀之，乃稍引退。五月，兀术北归假道，立斩其使。兀术怒，乃设南北两屯，绝楚州饷道。立引兵出战，大破之。会朝廷分镇，以立为徐州观察使，泗州、涟水军镇抚使，知楚州。立一日拥六骑出城，呼曰：“我镇抚也，可来接战。”有两骑将袭其背，立奋二矛刺之，俱堕地，夺两马而还。金兵追其后，立瞋目大呼，人马皆辟。易明日，金列三队邀战，立为三阵应之。金人以铁骑数百，横分其阵而围之。立奋身突围，持挺左右大呼，金人落马者不知数。承、楚间有樊梁、新开、白马三

湖，贼张敌万窟穴其间。立不与通，粮道愈梗。采鳧茭，屑榆皮食之。承州既陷，楚州益孤，立遣人诣朝廷告急。赵鼎欲遣张俊救之，俊不肯行，乃命刘光世督淮南诸镇救楚州。独东海李彥先首以兵至，扼淮河不得进。高宗览立奏，叹曰：“立坚守孤城，虽古名将无以逾之。”以书趣光世会兵者五，光世讫不行。金以外救绝，围益急。九月，攻东城，立募壮士焚其梯，火辄反向。立叹曰：“岂天未助顺乎？”忽风转，焚一梯。立喜，登磴道以观，飞炮中其首。左右驰救之，立曰：“我终不能为国殄贼矣！”言讫而绝，年三十有七。众巷哭，以参谋官程括摄镇抚使。金人疑立诈死，不敢动。越旬余，城始陷。立为人木强，不知书，忠义出天性。善骑射，与士卒均廩给。每战，擐甲胄先登，有退却者摔之，斩。刘豫遣立故人赍书约降，立不发书，焚其使市中，曰：“吾了此贼，必灭豫。”忠义之声远近倾下之，金人不敢斥其名。围既久，众益困，立夜焚香向东南拜，乃泣曰：“誓死守，不敢负国家。”立尝戒士卒：“不幸城破，必巷战决死。”及陷，众如其言。讣闻，辍朝，赠奉国节度使、开府仪同三司，官其子孙十人，谥忠烈。立祠，名曰显忠。《宋史·忠义传》。

魏胜，字彦威，淮阳军宿迁县人。多智勇，善骑射，应募为弓箭手，徙居山阳。绍兴三十一年，金人将南侵，胜跃然曰：“此其时也。”聚义士三百，北渡淮，取涟水军，宣布朝廷德意，不杀一人，涟水民翕然以听。遂取海州，入沂州，解苍山围，屡败金人。隆兴二年，以议和撤海州戍，命胜知楚州。时和议尚未决，金人乘其懈，以舟载器甲糗粮，诈称欲运粮

往泗州，由清河口入淮。胜知其谋，欲御之，安抚使刘宝以方议和，不许。金骑轶境，胜帅诸军拒于淮阳，自卯至申，胜负未决。金军增生兵来，胜与之力战，又遣人告急于宝。宝在楚州，相距四十里，坚谓方讲和，决无战事，迄不发一兵。胜矢尽，救不至，犹依土阜为阵，谓士卒曰：“我当死此，得脱者归报天子。”乃令步卒居前，骑为殿。至淮阴东十八里，中矢坠马死，年四十五。事闻，赠保宁军节度使，谥忠壮。立庙镇江，号曰褒忠。《宋史》本传。

耿世安，宋季为武翼大夫、淮东副总管、两淮都拨发官。初，谍报元兵至，制置使贾似道调世安提兵往涟水军增戍。众方犹豫，世安径迎至渔沟，以三百骑入阵鏖击。自午至酉，身被七创，犹能追杀溃兵。收兵还，至数里没。事闻，赠五官，立庙淮安，赐谥忠武。《宋史·忠义传》。

王孝忠，宋季为镇江前军统制，兼淮东路分，戍淮阴。杨贵叛，孝忠率众迎战，胜气百倍。俄，水军统制朱信降贼，孝忠孤军力不敌，死焉。《宋史·忠义传》。

元

褚不华，字君实，隰州石楼人，沉默有器局。泰定间，由监察御史迁河西道廉访佥事，移淮东。未几，升副使。汝颖盗发，势张甚。不华极力守御，多所斩获。且请知枢密院老章、判官刘甲守韩信城，相犄角为声援，复劾总兵及诸将逗留罪。朝廷录其功，升廉访使。甲有智勇，战辄胜，不华赖之。总兵闻不华劾己，益恚嫉，乃檄甲别将兵击贼。甲去，韩信城陷，贼乃掘堑相衔，掎水寨以围我。既而天长青军

叛,普颜铁木尔所统黄军亦叛,贼皆挟之来攻。不华知事危,退入哈刺章营。贼稍引去,乃出,抵杨村桥。贼奄至,杀廉访副使不达失里,啖其尸。不华以余兵入淮安。时城东、西、南三面皆贼,惟北门通沭阳,阻赤鲤湖为贼据,沭阳路绝。贼计孤城可取,进栅南锁桥。不华与元帅张存义出大西门,会僉事忽都不花兵突贼栅,殊死战,贼败走,追北二十余里。城中食且绝,元帅吴德琇运粮万斛入河,为贼所掠,德琇仅以身免。贼与青军攻围益急。总兵者屯下邳,遣使十九辈告急,皆不应。城中饿者仆道,即取啖之,草木、螺蛤、鱼蛙、燕乌及靴皮、鞍辔、革箱、败弓之筋皆尽,而后父子、夫妇、老稚更相食,撤屋为薪,人多露处。力尽城陷,不华犹据西门力斗,中伤见执,为贼所禽,次子伴哥,冒刃护之,亦见杀。时至正十六年十月乙丑也。不华守淮安五年,大小数百战,终与城俱亡。追封卫国公,谥忠肃。《元史·忠义传》。

明

梅殷,汝南侯思祖从子,尚宁国大长公主。靖难兵起,殷充总兵官守淮安,成祖假道,殷绝之。成祖乃渡泗水,出六合至京师,殷尚拥兵淮上。成祖迫公主招殷。殷得公主书,恸哭,询建文君所在,中使曰:“去矣。”殷曰:“君存与存,君亡与亡,吾姑忍俟之。”乃还京见上。上曰:“驸马劳苦。”殷曰:“劳而无功。”上衔之。永乐三年,死之。《续文献通考》。

武兴,宿州人。本姓伍,永乐间以骁勇立功,赐姓武。

深沉有谋略，正统初以都督僉事充漕运总兵，镇守淮安。土木之难，天下征兵，兴督神机营，与敌人战于彰义门外。兴以神铕列前，弓矢短兵次之，报效内官数百骑列后阵。敌稍却，报效者争功，自后跃马而出，阵乱，为敌所乘，兴中流矢死。谥忠毅，赠山阳伯。《山阳县志》。

史可法，字道邻，大兴人，进士。代朱大典督漕运，劾罢督粮道三人，增设漕储道一人。大浚南河，漕政大厘。时武备久弛，奏行更新八事。十七年，闻北都既陷，缟衣发丧。弘光既立，论翊戴功，进大学士。与马、阮不协，督师淮扬，分江北为四镇。八月，出巡淮安，阅刘泽清士马，请饷为进取资。十月，高杰帅师北征，可法赴清江浦送之，遣官屯田，为经略中原计。诸镇分汛地，自王家营而北最冲要，可法自任之。大清兵入宿迁，可法遣将御之，相持半月而解。明年，大兵南下，破扬州，可法被执，不屈，遂杀之。其家人葬其衣冠于梅花岭。《明史》本传。

镇抚大吏^①

郡志止守令而已，志镇抚大吏，不已侈乎？曰：非也。夫召伯去而棠存，羊公往而碑在，彼其所治，原非一州一邑之地，而后之人过其碑，仰其树，留连感泣，不能自己，岂不以其使节所临，仁风善政，足以系人遗思哉？淮安自东晋后，世为雄藩，文武大臣历代增置，国朝漕、河二院并建于

^① 目录作“镇抚大僚”。

此,屹然江淮间一都会。夫泽被一乡,惠周一邑,犹将尸而祝之,况膺数十州之重寄?其治愈远,其功愈大,尤不得与守令比,故特标而出之,志《镇抚大吏》。

晋

祖逖,字士(穉)[稚],范阳人。慷慨有节尚。元帝以逖为豫州刺史,渡江,击楫而誓,辞色壮烈,众皆慨服。屯于淮阴,起冶铸兵器,得二千余人而后进。累立战功,黄河以南尽为晋土。逖居官俭约,劝课农桑,克己务施,不畜资产,百姓感悦。卒,赠车骑将军,民为立祠。《晋书》本传。

郗鉴,字道徽,高平人。明帝时拜车骑将军、都督徐兖青三州军事、兖州刺史,镇广陵。时江左新创,广陵治淮阴故城。祖约、苏峻反,遣司马刘矩领三千人宿卫京师。鉴与寇密迹,城孤粮绝,人无固志,流涕设盟誓讨贼,以匡社稷。峻平,拜司空,加侍中。《晋书》本传。

蔡谟,字道明,陈留考城人。郗鉴薨,即拜谟为征北将军、都督徐兖青三州诸军事,镇广陵。时石虎于青州造船数百,掠缘海诸县,朝廷以为忧。谟随宜修防,甚有算略。康帝时拜司徒。《晋书》本传。

荀羨,字令则,颍川人。年二十八除北中郎将、监徐兖二州诸军事。中兴方伯,未有如羨之少者。羨北镇淮阴,屯田于东阳之石鳖。斩慕容兰以靖边。除散骑常侍,[让]不拜。追赠骠骑将军。《晋书》本传。

谢玄,字幼度,陈国阳夏人,太傅安从子。有经国才略,为桓豁司马。时苻坚强盛,边境数被侵寇,朝廷求文武良将

可镇北方者。安以玄应诏,拜建武将军、南兖州刺史、监江北诸军事。太和四年,坚将俱难等攻淮南,玄率兵三万,次白马塘。难迎战于塘西,玄大败之。难退保盱眙,玄进攻,又败之,退屯淮阴,玄率何谦等追之,战于君川,复大败之。玄还镇广陵。八年,坚复大举入寇,众号百万,玄复大破坚于淝水。封康乐县公,还镇淮阴。《晋书》本传。

宋

刘义庆,宗室。元嘉中,都督南兖(州)、徐、兖、青、冀、幽六州诸军事,南兖州刺史。治淮阴。^①性简素,寡嗜欲,受任历藩,无浮淫之过。《宋(史)[书]·长沙景王传》。

梁

柳庆远,字文和,河东解人。累官右卫将军。魏宿预城请降,受诏为援,假节,镇淮阴。魏军退,还京师。庆远在职颇励清节,士庶怀之。诏书称其“器识淹旷,思怀通雅”。卒,谥忠惠。《南史》本传。^②

康绚,字长明,华山蓝田人。(天启二)[天监九]年,假节、督北兖州诸军事、北兖州刺史。是时北兖州治淮阴,详见《沿革》。绚在州三年,大修城隍,号为严整。谥曰壮。《南

① 《宋书·州郡一》:“晋成帝立南兖州寄治京口。……文帝元嘉八年,始割江淮间为境,治广陵。……广陵太守,……晋武帝太康三年,治淮阴故城,后又治射阳,江左治广陵。……山阳太守,……去州水三百,陆同。”知刘宋时南兖州治广陵(今扬州),非淮境也。

② 查《南史》,无上述记载。见《梁书》本传。

史》本传。^①

隋

贺若弼，字辅伯，洛阳人。少慷慨有大志，便弓马，解属文。高祖受禅，有并江南之志。以若弼为楚州总管，与韩擒虎潜为经略，若弼陈献十策。以开皇九年大举伐陈有功，进爵宋国公。《隋书》本传。按，若弼一称吴州总管，今从《隋文帝本纪》。

唐

李承，赵州高邑人。德宗时累迁吏部（侍郎）〔郎中〕、淮南西道黜陟使。奏置常丰堰于楚州，以御海潮。溉屯田瘠卤，收常十倍他岁。《〔新〕唐书》本传。

南唐

徐铉，字鼎臣，会稽人。保大十一年冬，筑白水塘以溉屯田，遂诏州县陂塘湮废者皆修复之，力役暴兴。楚州人不堪其苦，群起为盗。元宗使内侍车延规、傅宏董其事，吏缘为奸，强夺民田为屯田，江淮骚然，道路以目。铉因奏事，白之元宗。乃遣铉乘传巡抚，行视利害。铉至楚州，悉取所夺田还之于民，诘责车延规，欲榜之，又捕得贼首，即斩于军，民困以苏。《十国春秋》。

宋

乔维岳，字伯周，陈州南顿人。仕宋，累官淮南转运使。淮水东流三十里，曰山阳湾，水势湍悍，运舟多溺，乃开故沙

^① 此亦不见于《南史》，见《梁书》本传。大修城隍为其在司州（今信阳）事，与淮无涉。

河,自末口至淮阴磨盘口四十里。又建安北至淮濫总五堰,运舟所至,十经上下,重载者皆卸粮而过,舟时坏失。维岳命创二斗门于西河第三堰,二门相距五十步,覆以厦屋,设悬门积水,俟潮平乃泄之。建横桥,岸上筑土垒石以牢其趾。自是弊尽革,而运舟往来无滞。赠兵部侍郎。《宋史》本传。

吴中甫,江淮发运使。自洪泽凿渠六十里,以避江淮漕运之险。《南畿志》。

王宗望,字礪叟,光州固始人。累官司农少卿、江淮发运使。楚州沿淮至涟水风涛险,舟多溺。宗望开支氏渠,引水入运河,公私咸利。迁河北都转运使。《宋史》本传。

张纶,字公信,颍州汝阴人。少倜傥任气。累官江淮制置、发运副使。奏除通、泰、楚三州盐户宿负,官助其器用,岁增课数十万。筑漕河堤二百里于高邮北,旁錙巨石为十础,以泄横流。又筑捍海堰一百五十里。人多德之。《宋史·循吏传》。按,石础,即今减水坝;捍海堰,即今范公堤是也。

蒋之奇,字颖叔,常州宜兴人。累官淮东转运副使。岁恶,民流,募使修水利以食流者,活民八万余,溉田九千顷。又请凿龟山左肘至洪泽为新河,以避淮险,自是无覆溺之患。又荐孝子徐积,每行部,必造之。《宋史》本传。

孙长卿,字次公,扬州人。知楚州粮料院。郡仓积米五十万,陈腐不可食,主吏皆惧,长卿为酌新旧,均渫之。累迁江浙荆淮发运使。岁漕米至八百万,或疑其多,长卿曰:“吾非欲事羨赢,以备饥岁耳。”长卿居官清洁,历龙图阁学士、

兵部侍郎。《山阳县志》。

韩世忠，字良臣，陕西延安人。风骨伟岸，勇力绝人。建炎六年，授京东、淮东路宣抚使，置司楚州。披草莱，立军府。夫人梁氏亲织薄为屋。抚集流散，通商惠工，山阳遂为重镇。刘豫聚众淮阳，世忠引军渡淮，旁符离而北，转战数十里，至其城下，为其所围。奋戈一跃，溃围而出。既而围淮阳，贼坚守不下。兀术与刘猷皆至。世忠勒阵向敌，遣人语之曰：“锦衣驄马立阵前者，韩相公也。”或危之，世忠曰：“不如是，不足以致敌。”敌果出，杀其导战二人，遂引去。寻归楚州，淮阳民从而归者以万计。帝在平江，世忠自楚州来朝。边报急，引兵渡淮，与金将讹里也力战，却之。刘猷将寇淮东，为世忠兵扼，不得进。金人废豫，中原震动。世忠谓机不可失，请全师北讨，招纳归附，为恢复计。会秦桧主和议，命世忠徙屯镇江。世忠言：“金人诡诈，恐以计缓我，乞留此军蔽遮江淮。”又力言和议之非。帝率优诏褒答。金使以诏谕为名，世忠凡四上书，曰：“不可许。兵马最重处，臣请当之。”既而伏兵洪泽镇，将杀金使，不克。九年，授少师。十年，击金人于浚口，败之，进太保。十一年，兀术围濠州，世忠与之战于淮岸，金人渡淮北去，自是不复入侵。世忠在楚州十余年，兵仅三万，而金人不敢犯。秦桧收三大将权，拜枢密使，遂以所积军储钱百万贯、米九十万石、酒库十五归于国。连疏乞解枢柄，封福国公，赠蕲王。《宋史》本传。

陈敏，字元功，赣之石城人。积官武锋军都统制，戍高邮。与金人战射阳湖，败之，焚其舟。召为骁骑上将军。言

事者议欲戍守清河口,敏言:“金兵每出清河,必遣人马先自上流潜渡。今欲必守其地,宜先修楚州城池。盖楚州为南北襟喉,彼此必争之地。长淮二千余里,河道通北方者五,清、汴、涡、颍、蔡是也;通南方以入江者,惟楚州运河耳。北人舟舰自五河而下,将谋渡江,非得楚州运河无缘自达。昔周世宗自楚州北神堰凿老鹳河,通战舰以入大江,南唐遂失两淮之地。由此言之,楚州实为两(朝)[淮]司命,愿朝廷留意。”乃诏与楚州守臣左祐同城楚州。祐卒,遂移守楚州。北使过者观其雉堞坚新,号“银铸城”。《宋史》本传。

陈损之,绍(兴)[熙]五年为准东提举。上言:“高邮、楚州之间,陂湖渺漫,菱葑弥漫,宜创立堤堰,以为潴泄。庶几水不泛溢,旱不干涸。乞兴筑自扬州江都县至楚州淮阴县三百六十里。又自高邮、兴化至盐城二百四十里,其堤岸旁开一新河,以通舟船。”仍存旧堤以捍风浪,栽柳十余万株,数年后堤岸亦牢,其木亦可备修补之用。兼扬州[柴]墟镇旧有堤闸,乃泰州泄水之处,其闸坏久,亦于此创立斗门。西引盱眙、天长众湖之水,起自扬州江都,经由高邮及楚州宝应、山阳,北至淮阴,西达于淮;又自高邮入兴化,东至盐城而极于海;又[自]泰州海陵南至扬州泰兴而彻于江。共为石碇十三,斗门七,乞以绍(兴)[熙]堰为名,镌诸坚石。时淮田多沮洳,赖捐之筑堤捍之,得良田数百万顷。[《宋史·河渠志》。]

崔与之,字正子,广州人。嘉定中,主管淮东安抚司事。时楚州工役繁夥,士卒苦之,叛入射阳湖,亡命多从之者。

与之给旗帖招之，众闻呼皆至，首谋者独迟疑不前，擒戮之，分其余隶诸军。后召为秘书少监，军民遮道流涕。《宋史》本传。

赵善湘，字清臣。淮南转运判官。以平楚州叛寇刘庆福等功，累进焕章阁直学士。李全犯淮东，为江淮制置使，专征讨。全诛，进兵部尚书。以恢复泰州、淮安、盐城、淮阴四城，封天水郡公。《宋史》本传。

赵范、赵葵，衡山人。父方，京湖制置使。范、葵随父征讨，屡立战功。李全据淮安，逆谋彰露，葵上书请讨，郑清之赞决之。时李全自青州降元，后复归淮安，有觐临安之意。值范、葵丁母忧，诏起复范为淮东安抚副使，葵提点淮东刑狱。范卒哭视事，请罢调停之议，传檄调兵，又檄射阳湖人为兵，分屯扼贼前后。李全破泰州，进攻扬州，范与葵合兵，屡战皆捷，遂斩全于新塘。群贼犹在山阳，推杨氏为主。范、葵步骑十万发扬州，追贼于湾头，以舟师入射阳湖，击贼于喻口、冈门。又分兵进屯平河桥，擒斩甚多，遣别将破贼砦于寿河、于港口。诸军薄淮安城下，贼大败，杨氏绝淮而去，淮安悉平，范、葵兄弟之功也。范进淮东安抚使，葵为淮东制置使。《宋史·赵葵传》《李全传》。

余玠，字义夫，蘄州人。少为白鹿洞诸生。时赵葵为淮东制置使，玠作长短句上谒，葵壮之，留幕中。累官制置司参议官。与元兵战，有功，授淮（安）〔东〕提点刑狱，兼知淮安州。淳祐元年，提兵援安丰，拜大理少卿、制置副使。后大著功名于西蜀。《宋史》本传。